

## ORIGINAL

Apelacioni sud Brčko distrikta Bosne i Hercegovine u vijeću sastavljenom od sudija Ilje Klaić kao predsjednika vijeća, Maide Kovačević i Ruže Gligorević kao članova vijeća, na sjednici vijeća održanoj dana 01.08.2011. godine, donio je slijedeće

### R J E Š E N J E

Inicijativa za pokretanje postupka ocjene usklađenosti člana 17. Organizacionog plana Direkcije za finansije Brčko distrikta Bosne i Hercegovine broj 04/1-014-614/7 od 16.11.2007. godine – dio koji se odnosi na organizacijsku jedinicu 3.15 Direkcija za finansije Brčko distrikta Bosne i Hercegovine – Poreska uprava, radno mjesto: Stručni saradnik za prinudnu naplatu poreza, organizacioni kod 373 kategorija radnog mjesta: državni službenik – stručni saradnik, platni razred: VI-6 sa članom 145. stav 3. Zakona o državnoj službi u organima uprave Brčko distrikta Bosne i Hercegovine (“Službeni glasnik Brčko distrikta BiH” broj 28/06, 29/06, 19/07, 2/08, 9/08, 44/08 i 25/09) SE ODBACUJE.

Ne prihvata se inicijativa za pokretanje postupka ocjene usklađenosti člana 17. Organizacionog plana Direkcije za finansije Brčko distrikta Bosne i Hercegovine broj 04/1-014-614/7 od 16.11.2007. godine – dio koji se odnosi na organizacijsku jedinicu 3.15 Direkcija za finansije Brčko distrikta Bosne i Hercegovine – Poreska uprava, radno mjesto: Stručni saradnik za prinudnu naplatu poreza, organizacioni kod 373 kategorija radnog mjesta: državni službenik – stručni saradnik, platni razred: VI-6 sa članom 7. Zakona o platama zaposlenih u organima uprave Brčko distrikta Bosne i Hercegovine (“Službeni glasnik Brčko distrikta BiH” broj 14/06).

### O b r a z l o ž e n j e

T. M. iz B. putem punomoćnika R. A., advokata iz B., podnio je Apelacionom sudu Brčko distrikta Bosne i Hercegovine (u daljem tekstu: Sud) inicijativu za pokretanje postupka ocjene usklađenosti člana 17. Organizacionog plana Direkcije za finansije Brčko distrikta Bosne i Hercegovine broj 04/1-014-614/7 od 16.11.2007. godine – dio

koji se odnosi na organizacijsku jedinicu 3.15 Direkcija za finansije Brčko distrikta BiH – Poreska uprava, radno mjesto: Stručni saradnik za prinudnu naplatu poreza, organizacioni kod 373 kategorija radnog mjesta: državni službenik – stručni saradnik, platni razred: VI-6 sa članom 7. Zakona o platama zaposlenih u organima uprave Brčko distrikta Bosne i Hercegovine i članom 145. stav 3. Zakona o državnoj službi u organima uprave Brčko distrikta Bosne i Hercegovine. U inicijativi se navodi da je organizacionim planom, suprotno navedenim zakonskim propisima „za poziciju na koju je raspoređen podnosilac inicijative, promijenjen platni razred VII-1 na VI-6 kao i uslovi radnog mjesta u pogledu školske sprema sa VSS na VŠS što jasno ukazuje da osporeni dio ili eventualno i drugi dijelovi navedenog organizacionog plana, nisu usklađeni sa gore navedenim zakonskim propisima što čini predmetnu inicijativu neosporno pravno utemeljenom“.

Sud je dopisom 097-0-OUZ-11-000001 od 24.05.2011. godine u skladu sa članom 15. stav 1. Zakona o postupku ocjene usklađenosti pravnih akata Brčko distrikta Bosne i Hercegovine („Službeni glasnik Brčko distrikta BiH“, broj 20/10) i članom 8. stav 1. i 2. Poslovnika o radu Apelacionog suda Brčko distrikta Bosne i Hercegovine u postupcima ocjene usklađenosti pravnih akata Brčko distrikta Bosne i Hercegovine i rješavanje sukoba nadležnosti („Službeni glasnik Brčko distrikta BiH“, broj 45/10-u daljem tekstu Poslovnik) zatražio dostavljanje odgovora od strane donosioca akta.

Dana 04.07.2011. godine Vlada Brčko distrikta Bosne i Hercegovine, Odjeljenje za stručne i administrativne poslove je svojim aktom broj 02-0263NS-0001/11 od 28.06.2011. godine dostavilo odgovor u kojem se navodi da je osporeni Organizacioni plan u skladu sa relevantnim zakonskim propisima.

Sud je utvrdio da je članom 19. Zakona o izmjenama i dopuna Zakona o državnoj službi u organima uprave Brčko distrikta BiH („Službeni glasnik Brčko distrikta BiH“, broj 2/08), a koji je stupio na snagu 20.02.2008. godine, član 145. stav 3. tog Zakona brisan.

S obzirom da je dana 20.02.2008. godine prestala da važi odredba člana 145. stav 3. Zakona o državnoj službi u organima uprave Brčko distrikta BiH, sud je utvrdio da ne postoje procesne pretpostavke za razmatranje inicijative u vezi eventualnog pokretanja postupka usklađenosti osporenog Organizacionog plana sa navedenom odredbom Zakona o državnoj službi u organima uprave Brčko distrikta BiH, pa je inicijativa u tom dijelu odbačena u skladu sa članom 18. stav 1. tačka d. Zakona o postupku ocjene usklađenosti pravnih akata Brčko distrikta Bosne i Hercegovine.

**Relevantne odredbe Zakona o platama zaposlenih u organima uprave Brčko distrikta Bosne i Hercegovine:**

Član 7.

(promjene stepena platnog razreda i podrazreda)

Stepen platnog razreda i podrazreda utvrđuje se odlukom ili ugovorom o radu i mijenja se u skladu sa zakonom.

Podnosilac inicijative ukazuje da je za poziciju na koju je raspoređen podnosilac inicijative promijenjen platni razred sa VII-1 na VI-6 (koji stepeni platnih razreda su regulisani članom 5. stav 2. Zakona o platama zaposlenih u organima uprave Brčko distrikta Bosne i Hercegovine) suprotno odredbi člana 7. Zakona o platama zaposlenih u organima uprave Brčko distrikta Bosne i Hercegovine, odnosno ukazuje se na činjenicu da je član 17. (u osporenom dijelu) Organizacionog plana od 16.11.2007. godine donesen suprotno navedenoj odredbi Zakona, jer je donesen, odnosno izmijenjen „arbitrarno“.

Članom 5. stav 1. Zakona o platama zaposlenih u organima uprave Brčko distrikta Bosne i Hercegovine propisano je da platni razred koji se sastoji od 6 podrazreda izraženih koeficijentima je osnovni klasifikacioni element sistema plaćanja rada zaposlenih, a određuje se na osnovu vrste, složenosti, odgovornosti, uticaja, pritiska i obrazovanja koje radno mjesto zahtijeva. Dok je članom 6 istog Zakona propisano da nazivi radnih mjesta i uslovi neophodni za obavljanje poslova na tim radnim mjestima, utvrđuju se organizacionim planom i pravilnicima o unutrašnjoj organizaciji i sistematizaciji radnih mjesta organa uprave Brčko distrikta Bosne i Hercegovine, a u skladu sa članom 5. Zakona o platama zaposlenih u organima uprave Brčko distrikta Bosne i Hercegovine.

Iz prethodno navedenog proizilazi da platni razred i podrazred utvrđuje poslodavac u skladu sa uslovima člana 5. Zakona o platama zaposlenih u organima uprave Brčko distrikta Bosne i Hercegovine, a isti se određuje organizacionim planom u skladu sa članom 5. tog Zakona. Dakle, sistematizacija radnih mjesta i uslovi za to radno mjesto, te stepen platnog razreda i podrazreda za to radno mjesto jeste u diskrecionoj sferi poslodavca.

Nadalje, osporeni organizacioni plan je donesen Odlukom direktora Direkcije za finansije Brčko distrikta broj broj 04/1-014-616/07 od 16.11.2007. godine, a članom 7. Zakona o platama

zaposlenih u organima uprave Brčko distrikta Bosne i Hercegovine je propisano da se stepen platnog razreda i podrazreda utvrđuje odlukom, pa je stepen platnog razreda za radno mjesto Stručni saradnik za prinudnu naplatu poreza, organizacioni kod 373 kategorija radnog mjesta: državni službenik – stručni saradnik, platni razred: VI-6 utvrđen u skladu sa Zakonom. Dakle, stepen platnog razreda u konkretnom slučaju nije mijenjan, nego je utvrđena nova sistematizacija radnih mjesta i platni razredi za ta radna mjesta, a od strane nadležnog organa u skladu sa članom 19. Zakona o Direkciji za finansije Brčko distrikta Bosne i Hercegovine (“Službeni glasnik Brčko distrikta BiH“ broj 19/07).

Slijedom prethodno iznesenog, sud primjenom člana 27. tačka e. Zakona o postupku ocjene usklađenosti pravnih akata Brčko distrikta Bosne i Hercegovine nije prihvatio inicijativu za pokretanje postupka ocjene zakonitosti člana 17. Organizacionog plana Direkcije za finansije Brčko distrikta Bosne i Hercegovine broj 04/1-014-614/7 od 16.11.2007. godine – dio koji se odnosi na organizacijsku jedinicu 3.15 Direkcija za finansije Brčko distrikta Bosne i Hercegovine – Poreska uprava, radno mjesto: Stručni saradnik za prinudnu naplatu poreza, organizacioni kod 373 kategorija radnog mjesta: državni službenik – stručni saradnik, platni razred: VI-6.

Na osnovu prethodno navedenog Sud je odlučio kao u izreci odluke.

#### APELACIONI SUD BRČKO DISTRIKTA BOSNE I HERCEGOVINE

Broj: 097-0-OUZ-11-000001

Brčko, 01.08.2011. godine

ČLANOVI VIJEĆA:

PREDSJEDNIK VIJEĆA,

1. \_\_\_\_\_  
Maida Kovačević

Iljo Klaić

2. \_\_\_\_\_  
Ruža Gligorević